

**Uunga siunnersuut: Naatsorsueqqissaartarfik pillugu Inatsisartut inatsisaata allanngortinneqarneranik Inatsisartut inatsisaat nr. xx, xx. xxx 2017-imeersoq**

(Siulersuisunut ajunngitsorsiarititat)

*(Aningaasaqarnermut Akileraartarnermullu Naalackersuisoq)*

**pillugu**

**Aningaasaqarnermut Akileraartarnermullu Ataatsimiititaliap**

**siunnersuutip aappassaaneerreqarneranut**

**ISUMALIUTISSIISUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Jens Immanuelson, Siumut, siulittaasoq  
 Inatsisartunut ilaasortaq Randi V. Evaldsen, Demokraatit, siulittaasup tullia  
 Inatsisartunut ilaasortaq Peter Olsen, Inuit Ataqtigiit  
 Inatsisartunut ilaasortaq Bendt Kristiansen, Inuit Ataqtigiit  
 Inatsisartunut ilaasortaq Martha Lund Olsen, Siumut  
 Inatsisartunut ilaasortaq Ineqi Kielsen, Siumut  
 Inatsisartunut ilaasortaq Kelly Berthelsen, Inuit Ataqtigiit

Ulloq 2. oktober 2017-imi siullermeerinninnerup kingorna ataatsimiititaliap siunnersuut misissorpaa.

**1. Siunnersuutip imarisaa siunertaalu**

Siulersuisunut ilaasortanut ajunngitsorsiarititanik aalajangersaanissamut maleruagassanik aalajangersaanissamut taamatullu siulersuinut ilaasortat Naatsorsueqqissaartarfimmi atuunnerminnut atatillugu angalanermut, nerisaqarnermut, najugaqarnermut assigisaannullu aningaasartuutaannut ajunngitsorsiarititanik aalajangersaanissamut piginnaatinneqarnissaq Naalackersuisut inatsisissatut siunnersuut aqutugalugu kissaatigaat.

Atuuffiup inuttassarsiornerani qinigassaqarluarnissap qulakkeerneqarnissaa Naalackersuisut kissaatigaat, taamaattumillu Naatsorsueqqissaartarfimmi siulersuisunut ilaasortanut ajunngitsorsiarititat pillugit maleruagassat allanngortinneqarnissaat maanna siunnersuutigineqarluni. Siulersuisunut ilaasortatut atuuffik manna tikillugu akissarsiaqaataasarsimangilaq.

**2. Siunnersuutip Inatsisartunit siullermeerneqarnera**

Siunnersuut siullermeerinninnermi nalinginnaasumik taparserneqarpoq, aappassaaneerneqan-ginnerminili Aningaasaqarnermut Akileraartarnermullu Ataatsimiititaliamit suliarineqartus-sanngorlugu innersuunneqarluni.

### **3. Tusarniaanermut akissutit**

Siunnersuut 2017-imi 5. majimit 19. junimut ukununnga tusarniaassutigineqarpoq:

SIK, Sulisitsisut (GE), NUSUKA, KANUKOKA, Naalakkersuisut Siulittaasoqarfiata Naalakkersuisoqarfia, Aatsitassarsiornermik Naalakkersuisoqarfik, Inuussutissarsiornermut, Suliffegarnermut, Niuernermit Nukissiuuteqarnermullu Naalakkersuisoqarfik, Peqqissutsimut Naalakkersuisoqarfik, Aalisarnermut Piniarnermullu Naalakkersuisoqarfik, Isumaginninnermut, Ilaqutariinnermut, Naligiissitaanermut Inatsisinillu Atuutsitsinermit Naalakkersuisoqarfik, Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfik, Pinngortitamut Avatangiisinullu Naalakkersuisoqarfik, Namminiilivinnermut, Nunanut Allanut Nunalerinnermullu Naalakkersuisoqarfik, Kommunit, Nunaqarfinnut, Isorliunerusunut, Attaveqatigiinnermut Ineqarnermullu Naalakkersuisoqarfik aammalu Naalakkersuisut tusarniaatillutik atortagaat.

Naalakkersuisut Siulittaasoqarfianit, Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfimmit, Nunanut Allanut Pisortaqarfimmit, Pinngortitamut Avatangiisinullu Naalakkersuisoqarfimmit aammalu Peqqinnissamut Naalakkersuisoqarfimmit tusarniaanermut akissuteqartoqarpoq.

Tusarniarneqartut akissuteqarnissamut minnerpaamik sapaatip akunnerinik sisamanik piffissalerneqartarnissaannik ataatsimiititaliap naatsorsuutiginninnerata Naalakkersuisunit eqquut-sinneqarnera, tamatumani KANUKOKA-p akissuteqarnissamut sapaatip akunnerinik tallimanik piffissalerneqarsimanera ataatsimiititaliamit nersorumaneqarpoq. Inatsimmik piareersaalluni sulinermit tusarniaanermik ingerlatsineq pingaaruteqartutut pisariaqartutullu inissisimasoq ataatsimiititaliap isumaqarpoq.

### **4. Ataatsimiititaliap siunnersuummik suliarinninnera**

Naatsorsueqqissaartarfimmi siulersuisuni inissat inuttalerneqarnissaanni qinigassaqluarnissap qulakkeerneqarnissaannik kissaateqarneq Naalakkersuisut siunnersuummut tunngavilersuutigaat. Atuuffiup inuttassarsiornerani qinigassaqluarnissap qulakkeerneqarnissaannik kissaateqarneq Naatsorsueqqissaartarfimmi maanna siulersuisuusunik Naalakkersuisut toqqaanerannut qanoq sunniuteqarsimansoq Naalakkersuisunit erseqqinnerusumik nassuiarneqanngilaq. Taamaallutillu siulersuinut ilaasortassat Naalakkersuisut namminneerlutik ukiut pingasukkaartumik toqqartarpaat, taamaattumillu inuiaqatigiinni pissutsinik siulersuisunut ilaasortat paasisimasaqarnissaannik inatsimmi piumasaqaatip eqqortinneqarnissaata qulakkeernissanut Naalakkersuisut nammineq periarfissaqarlutik. Taamaattumillu ersernerluppoq siunnersuut ima paasineqassanersoq; siulersuisunut ilaasortat maanna katitigaanerit qinigassakippallaarsimanerup kingunerigaa. Tamanna tunngavigalugu siulersuisunut ajunngitsorsiarititat atuutilernerisa kingorna Naalakkersuisut siulersuinik nutaanik toqqaassappata paasilluarneqarsinnaavoq.



Ullumikkut siulersuisunut siulittaasoq kisimi ajunngitsorsisarpoq. Ajunngitsorsiat Namminersorlutik Oqartussat aktiaateqarluni ingerlatseqatigiiffiini siulersuisunut siulittaasumut minnerpaaffissatut ajunngitsorsiarititat atuuttut affaatut annertussuseqarput. Inatsimmi § 5, imm. 5-imi aalajangersakkami atuuttumi ima allassimavoq:

*“Immikkoortoq 5. Naalakkersuisut pisussaatinneqarput ukiumoortumik siulersuisut siulittaasuannut ajunngitsorsiassaqaqtitsissallutik, Namminersorlutik Oqartussat tamakkiisumik ilaannakortumilluunniit suliffeqarfinni piginneqataaffigisaanni, siulersuisut siulittaasuisa ajunngitsorsiassaasa piffissami minnerpaaffiisa affaanik nalilimik.”*

Naatsorsueqqissaartarfimmi siulersuisunut ajunngitsorsiaqaqtitsinissaq pillugu maleruagassanik Naalakkersuisut aalajangersaasinnaanannerannik aalajangersaasumik aalajangersakkap siuliani taaneqartup taarserneqarnissaa siunnersuutikkut matumuuna anguniarneqarpoq. Naatsorsueqqissaartarfimmi siulersuisunut ilaasortat ajunngitsorsiaqaqtitaanerat ajunngitsorsiaqaqtitaasunut allanut, soorlu Kalaallit Nunaata Radiuani siulersuisut inuttalersugaanerannut atuuttumut naleqqussarneqassasoq siunnersuummut nalinginnaasumik nassuiaatini siunnersuutigineqarpoq. Taamatut innersuussuteqarneq atuartussamit paasilluarneqaqqullugu ajunngitsorsiaqaqtitaasunut allanut naleqqussaanaissaq siunnersuummut nalinginnaasumik nassuiaatini Naalakkersuinit nassuiarneqarsimasuuppat naleqqussimassagaluarpoq. Ataatsimiititaliamimmi maluginiarneqarpoq Kalaallit Nunaata Radiuani siulersuisut aningaasaqarnikkut sukumiinerusumik akisussaatinneqarmata, soorlu tamanna siulersuisunut tunngatillugu nalinginnaasumik naatsorsuutigineqarsinnaasoq.

Inatsisip 2015-imi kingullermik allanngortinneqarnerani allassimasutut siulersuisut siulittaasuat ukiumut annerpaamik 75.000 kr.-inik ajunngitsorsiaqaqtinneqartarpoq. Siunnersuummut nalinginnaasumik nassuiaatini siunnersuutigineqarpoq siulersuisunut ilaasortanut ukiumoortumik ajunngitsorsiarititat annerpaamik 35.000 kr.-iussasut siulersuisullu siulittaasuannut annerpaamik 90.000 kr.-iussasut. Eqqortusaaq pillugu ataatsimiititaliamit erseqqissarneqassaaq inatsisissatut siunnersuummut nassuiaatit inatsisip oqaasertarinngimmagit, taamaattumillu aalajangiiffigineqarsinnaanatik. Taamaattumillu aningaasat taaneqartut annertussusissaat ataatsimiititaliamit angerneqarsinnaananilu naaggaarneqarsinnaanngilaq.

Naalakkersuisut naapertorlugit ajunngitsorsiarititat annertussusaata inissinneqarneranut pissutaavoq Naatsorsueqqissaartarfimmi siulersuisuni ilaasortatut siulersuisunullu siulittaasut suliassap annertussusia, tassanilu isiginiarneqartut tassaasut ataatsimiinnissat, piareersarnissat, angalanissat aammalu Naatsorsueqqissaartarfiup saqqummersittagaanut malinnaanissamut piffissamik atuneq. Naalakkersuisut paasissutissiissutigaat ajunngitsorsiarititat assigiinngisutaannut pissutaasoq Naatsorsueqqissaartarfimmi siulersuisunut siulittaasup akisussaaffeqarnerunera. Tamatuma peqatigisaanik Naalakkersuisut paasissutissiipput siulersuisunut siulittaasup Naatsorsueqqissaartarfimmi aningaasaqarnikkut pissutsinut tunngatillugu akisussaaffiligaannginnera isiginiarneqarsimasoq, tamannalu Kalaallit Nunaata Radiuani siulersuisut akisussaaffeqarnerannut akerliuvoq.

Siulersuisut qulliunerusutut akisussaaffimmik isumaginnittut aningaasaqarnikkut pissutsinut akisussaaffimmik pisussaaffilerneqannginnerat ataatsimiititaliamit eqqumiiginartinneqarpoq. Taamaattumik apeqqutaalerpoq Naatsorsueqqissaartarfimmi aningaasaqarnikkut akisussaaffik kimit tigummiarneqarnersoq. Pineqartoq piffinni marlunni taaneqartoq ataatsimiititaliap siumorpa.

Naatsorsueqqissaartarfimmi aningaasaqarnikkut sulisoqarnikkullu pissutsit Aningaasaqarnermut Naalakkersuisoqarfimmit qulliunerusumik akisussaaffigineqartut Naatsorsueqqissaartarfup 2016-imut ukiumoortumik nalunaarutaani allassimasoq ataatsimiititaliamit maluginiarneqarpoq.

Kiisalu atorfik aningaasaqarnikkut, sulianut sulisunullu pissutsinut tamanut akisussaaffeqarfiusoq Naatsorsueqqissaartarfimmi maanna pisortassarsiornermi allassimasoq ataatsimiititaliamit maluginiarneqarpoq.

Kontomummi pingaarnermut 20.16.01-imut missingersuutinut ilanngussamili ilaatigut allasimavoq siulersuisut ukiumoortumik suliassanut pilersaarummi aningaasanut killissarititaasut iluanni naqitat suut saqqummersinneqassanersut aalajangersassagaat. Suliassaqarfimmut Naalakkersuisup, siulersuisut aammalu Naatsorsueqqissaartarfimmut ulluinnarni aqutsisup akornanni akisussaaffimmik agguataarineq Naalakkersuisunit tamakkiisumik aqunneqartoq ataatsimiititaliamit tutsuigineqarpoq.

Ataatsimiititaliamit eqqumaffigeqquneqassaaq siunnersuutip kalaallisoortaani oqaaseq ”ajunngitsorsiarititat” kisimi atorneqarmat, siunnersuummullu nalinginnaasumik nassuiaatini oqaatsit ”akissarsiarititat” aamma ”ajunngitsorsiarititat” (danskisut ”honorering” aamma ”godtgørelse”) eqqortumik immikkoortinneqarmata. Ataatsimiititaliamit siunnersuutigineqassaaq kalaallisuuata danskisuuatalu imminnut naapertuutlernissaannik qulakkeerinnittumik Naalakkersuisut aappassaaneerinninnissamut allannguutissatut siunnersuummik saqqummiussissasut.

##### **5. Siunnersuutip aningaasaqarnikkut kingunerisassai**


Siunnersuutip aningaasaqarnikkut allaffissornikkullu kingunerisassai pillugit siunnersuuteqartup naatsorsuutigisaanut Aningaasaqarnermut Akileraartarnermullu Ataatsimiititaliap anertunerusumik oqaaseqaatissaqanngilaq.

##### **6. Ataatsimiititaliap inassuteqaatai**

Tamanna tunngavigalugu siunnersuut Inatsisartunit akuerineqassasoq **ataatsimiititaliap isumaqatigiittup inassutigaa.**




Taama oqaaseqarluni isumaliutissiisummilu allassimasutut oqaaseqaateqarluni ataatsimiititaliap siunnersuut aappassaaniigassanngortippaa.




Jens Immanuelson,  
siulittaasoq



Randi V. Evaldsen



Peter Olsen



Bendt B. Kristiansen



Martha Lund Olsen



Ineqi Kielsen



Kelly Berthelsen